

Skipulagsskrá fyrir Kynningarmiðstöð íslenskrar myndlistar

Skipulagsskrá fyrir sjálfseignarstofnunina - Kynningarmiðstöð íslenskrar myndlistar

Stofnun: **1. gr.**

Kynningarmiðstöð íslenskrar myndlistar (KÍM) er sjálfseignarstofnun með sérstaka stjórn og starfar á grundvelli laga nr. 19/1988 um sjóði og stofnanir sem starfa skv. staðfestri skipulagsskrá. Heimili hennar og varnarþing er í Reykjavík.

Stofnunin ein ber ábyrgð á skuldbindingum sínum. Stofnunin er ekki háð neinum lögaðilum og mun ekki hafa með höndum atvinnurekstur í skilningi laga nr. 33/1999.

Stofnendur Kynningarmiðstöðvar íslenskrar myndlistar eru: Hafnarborg menningar- og listastofnun Hafnarfjarðar, Listasafnið á Akureyri, Listasafn ASÍ, Listasafn Íslands, Listasafn Kópavogs, Listasafn Reykjavíkur, Myndstef, Nýlistasafnið, Samband íslenskra myndlistarmanna og Utflutningsráð. Hver framangreindra stofnenda tilnefnir einn fulltrúa í fulltrúaráð og annan til vara nema Samband íslenskra myndlistarmanna sem tilnefnir fimm fulltrúa og jafn marga til vara.

Stofnfé Kynningarmiðstöðvar íslenskrar myndlistar eru 621.000 kr. sem lagt er fram af menntamálaráðuneyti. Af stofnfé varðveitist á núgildandi verðlagi kr. 621.000,- sem skal vera óskerðanlegur höfuðstóll og ávaxtað með tryggilegum hætti. Fjárhagslegar skuldbindingar stofnunarinnar umfram stofnframlag eru stofnendum óviðkomandi.

Markmið: **2. gr.**

Markmið Kynningarmiðstöðvar íslenskrar myndlistar er að kynna íslenska myndlist erlendis og auka þátttöku íslenskra myndlistarmanna í alþjóðlegu myndlistarstarfi. Það gerir miðstöðin m.a. með því að:

- a.** Eiga frumkvæði að og efna til samstarfs um sýningar á íslenskri myndlist á alþjóðlegum vettvangi.
- b.** Þjóða blaðamönnum, sýningarstjórum og öðrum erlendum aðilum til Íslands í því skyni að efla tengsl við alþjóðlegt listaumhverfi.
- c.** Taka þátt í alþjóðlegu samstarfi um vinnustofur og kynningum á listamönnum sem þar dvelja.
- d.** Taka þátt í öðru alþjóðlegu samstarfi sem forstöðumaður og stjórn telja að þjóni markmiði starfseminnar.
- e.** Eiga frumkvæði að og taka þátt í skipulagningu alþjóðlegra myndlistarviðburða á Íslandi.

f. Hafa forgöngu um að fyrir hendi sé listamannatal á vefnum í samvinnu við listamenn og samtök þeirra.

g. Veita ráðgjöf um kynningu á íslenskri myndlist erlendis, t.d. til utanríkisþjónustunnar og annarra er þess óska.

h. koma upp vef þar sem upplýsingum og kynningum er komið á framfæri og annarri upplýsingastarfsemi sem best þykir hæfa hverju sinni. Ritstjórn og ábyrgð á efni vefsins er á hendi forstöðumanns.

Ársfundur fulltrúaráðs:

3. gr.

Fulltrúaráð Kynningarmiðstöðvarinnar kemur saman til ársfundar, sem skal haldinn fyrir lok maí mánaðar ár hvert. Stjórn boðar til ársfundar bréflaga með minnst 14 daga fyrirvara. Fundurinn er löglegur ef löglega er til hans boðað. Rétt til setu á ársfundi fulltrúaráðs hefur einn fulltrúi frá hverjum stofnanda en Samband íslenskra myndlistarmanna hefur rétt á fimm fulltrúum, sbr. 1.gr. Formaður stjórnar stýrir ársfundum en fundurinn kýs ritara til að rita fundargerðir og skulu þær sendar fundarmönnum. Hverjum fundarmanni er heimilt að fá bókaða stutta greinargerð um afstöðu sína til einstakra mála. Á ársfundi er tilkynnt um skipun stjórnar sbr. 5. gr.

4. gr.

Dagskrá ársfundar skal vera sem hér segir:

- 1) Skýrsla um starfsemi síðasta starfsárs.
- 2) Reikningar liðins árs kynntir.
- 3) Fjárhagsáætlun kynnt.
- 4) Tekin afstaða til aðildargjalda.
- 5) Önnur mál.

Til þess að mál nái fram að ganga á ársfundi þarf að minnsta kosti helmingur fulltrúa að vera á fundi og meiri hluti þeirra að greiða atkvæði með málinu.

Stjórn:

5. gr.

Starfsemi Kynningarmiðstöðvarinnar er á ábyrgð stjórnar og forstöðumanns, sem hún ræður. Stjórn stofnunarinnar skipa fimm menn. Skulu tveir þeirra tilnefndir af Sambandi íslenskra myndlistarmanna, einn fulltrúi tilnefndur af menntamálaráðuneytinu og einn af utanríkisráðuneytinu. Einn fulltrúi skal kosinn á fundi forstöðumanna listasafna, sem aðild eiga að stofnuninni, með einfaldri atkvæðagreiðslu. Forstöðumaður Listasafns Íslands boðar skriflega til fundarins með a.m.k. tveggja vikna fyrirvara. Varamenn skulu tilnefndir með sama hætti. Stjórnarmenn eru tilnefndir til þriggja ára í senn og mega ekki sitja meira en tvö tímabil. Stjórnin skiptir með sér verkum og kýs úr sínum hópi formann, varaformann, ritara og meðstjórnendur til eins árs í senn. Stjórnin setur reglur sem miða að því að tryggja hæfilega endurnýjun innan hennar. Reglur þessar skulu lagðar fyrir ársfund til samþykktar.

6. gr.

Stjórn Kynningarmiðstöðvar íslenskrar myndlistar heldur fundi svo oft sem þurfa þykir. Hún ræður forstöðumann og þarf samþykki allra stjórnarmanna fyrir þeirri ráðningu.

Stjórnarfundur er ályktunarbær ef formaður og a.m.k. 2 aðrir stjórnarmenn sækja hann. Einfaldur meirihluti atkvæða ræður úrslitum á stjórnarfundum. Halda skal fundargerðir um stjórnarfundum.

Stjórnin ber ábyrgð á rekstri, fjárreiðum og fjárvörslu stofnunarinnar og samþykkir fjárhagsáætlun. Allar meiri háttar fjárskuldbindingar eru háðar samþykki stjórnarinnar.

Fagráð:

7. gr.

Í fagráði sitja forstöðumaður, annar tveggja fulltrúa SÍM í stjórn KÍM, skv. tilnefningu stjórnar SÍM og einn úr stjórn KÍM skv. ákvörðun hennar. Fagráð tekur ákvarðanir, f.h. stjórnar, um veitingu styrkja, velur listamenn til þátttöku í alþjóðlegum myndlistarsýningum og öðrum verkefnum sem eru á vegum miðstöðvarinnar. Fagráð skal skipað til tveggja ára í senn.

Forstöðumaður stýrir fundum fagráðs og leggur fyrir það erindi. Fulltrúar í fagráði eru í störfum sínum bundnir fullum trúnaði gagnvart stjórn KÍM. Verði ágreiningur um afgreiðslu málefni í fagráði skal skjóta þeim ágreiningi til stjórnar KÍM sem afgreiðir málið endanlega.

Fagráð tilnefnir tvo fulltrúa fyrir hönd stjórnar til ráðgjafar við úthlutun styrkja aldrei þó undir kr.50.000. Fulltrúarnir hafa atkvæðarétt til jafns við skipaða meðlimi fagnefndar. Fulltrúi má ekki vera í fagnefnd oftari en einu sinni á ári hverju.

Forstöðumaður:

8. gr.

Forstöðumaður er yfirmaður stofnunarinnar í fullu starfi, ráðinn af stjórn hennar til fimm ára í senn. Hann mótastarfsemi stofnunarinnar og er ábyrgur fyrir henni gagnvart stjórn. Hann sér um daglegan rekstur og stjórn fjármála KÍM í umboði stjórnar, vinnur að fjáröflun og undirbýr gerð fjárhagsáætlunar og annast reikningsskil. Hann leggur fjárhagsáætlun fyrir stjórn til samþykktar og er ábyrgur fyrir framkvæmd hennar gagnvart stjórn. Hann ræður annað starfsfólk stofnunarinnar. Í ráðningarsamningi forstöðumanns skal kveðið á um starfstíma og starfskjör að öðru leyti. Ráðning hans skal tilkynnt á ársfundi. Starf forstöðumanns skal auglýst laust til umsóknar í fjölmiðlum. Forstöðumaður situr stjórnarfundum með málfrelsis- og tillögurétti nema sérstakar ástæður mæli gegn því, s.s. þegar fjallað er um starfskjör hans.

Um fjárhag og reikningsskil:

9. gr.

Tekjur KÍM, auk vaxta af stofnframlagi, eru framlög frá ríki og öðrum aðilum, sbr. og 11. gr., tekjur af þjónustu auk frjálsra framlaga frá einstaklingum, fyrirtækjum og samtökum og annars aflafjár. Fé stofnunarinnar skal einvörðungu varið til að standa straum af þeim kostnaði sem til fellur við að vinna að markmiðum þeim sem skilgreind eru í 2. gr.

Gera skal einstaklingum og öðrum lögaðilum kleift að gerast styrktaraðilar stofnunarinnar, skv. nánari ákvörðun stjórnar um styrktarmannakerfi.

Forstöðumaður undirbýr gerð fjárhagsáætlunar. Stjórnin gengur frá áætluninni í endanlegri gerð og kynnir hana ársfundi fulltrúaráðs til staðfestingar.

10. gr.

Reikningsár KÍM er almanaksárið. Um reikningshald fer að lögum nr. 19/1988 um sjóði og stofnanir sem starfa samkvæmt staðfestri skipulagsskrá. Forstöðumaður skal í fyrstu viku marsmánaðar ár hvert leggja eftirfarandi gögn fyrir stjórn KÍM til afgreiðslu:

1. Skýrslu um starfsemi síðasta starfsárs
2. Ársreikning liðins starfsárs.

Reikningar KÍM skulu endurskoðaðir af löggiltum endurskoðanda, sem skipaður er af stjórn til a.m.k. tveggja ára í senn. Formaður stjórnar skal sjá til þess að ársreikningur berist Ríkisendurskoðun með tilskildum hætti ár hvert.

11. gr.

Stjórnin gerir samning við menntamálaráðuneytið um fjárframlag til rekstrar KÍM. Þá gerir stjórnin samkomulag við ráðuneytið um verkefni sem KÍM tekur að sér fyrir það. Stjórninni er heimilt að gera viðlíka samninga við önnur ráðuneyti, sveitarstjórnir, félög og stofnanir svo fremi sem verkefnin falla að markmiðum KÍM.

Um úrsögn aðila, slit stofnunar og breytingar á skipulagsskrá:

12. gr.

Stofnunin verður einungis lögð niður ef ársfundur fulltrúaráðs samþykkir það með $\frac{3}{4}$ hlutum atkvæða. Verði samþykkt að leggja stofnunina niður skal menntamálaráðuneytið ákveða í samráði við síðustu stjórn KÍM hvernig fara skuli með eigur hennar.

13. gr.

Skipulagsskrá Kynningarmiðstöðvar íslenskrar myndlistar verður því aðeins breytt að $\frac{3}{4}$ fulltrúa á ársfundi fulltrúaráðs samþykki slíkt, enda hafi þess verið getið í fundarboði að tillaga um breytingu á henni verði lögð fram á fundinum. Tillögur um breytingar þurfa að berast stjórn fjórum vikum fyrir aðalfund.

Ef tilskilinn fjöldi fulltrúa er ekki á ársfundi fulltrúaráðs við afgreiðslu á breytingum

á skipulagsskrá, skal senda tillögurnar til aðila stofnunarinnar og boða til framhaldsfundar innan mánaðar og ræður þá afl atkvæða um samþykkt þeirra.

14. gr.

Ef ágreiningur rís um skilning á skipulagsskrá þessari sker ársfundur fulltrúaráðs úr um þann ágreining að fenginni umsögn ágreiningsaðila og stjórnar.

15. gr.

Leita skal staðfestingar dómsmálaráðherra á skipulagsskrá þessari og breytingar á henni skulu einnig hljóta staðfestingu sama ráðherra.

16. gr.

Skipulagsskrá þessi öðlaðist gildi á framhaldsstofnundi Kynningarmiðstöðvar íslenskrar myndlistar 16. febrúar 2004.

Undirskrift stofnaðila:

Hafnarborg menningar- og listastofnun Hafnarfjarðar

Pétrún Pétursdóttir

Listasafnið á Akureyri

Hannes Sigurðsson

Listasafn ASÍ

Kristín Guðnadóttir

Listasafn Íslands

Ólafur Kvaran

Listasafn Kópavogs

Guðbjörg Kristjánsdóttir

Listasafn Reykjavíkur

Eiríkur Þorláksson

Myndstef

Knútur Bruun

Nýlistasafnið

Pétur Már Gunnarsson

Samband íslenskra myndlistarmanna

Áslaug Thorlacius

Útflutningsráð

Jón Ásbergsson
